

白雲軒存稿

白雲軒存稿卷之一

宿遷張偉庚珠南著

天妃閣

洪湖滙巨浸奔流注此間水花翻雪浪晴雷吼瀑泉漕  
艘峩峩來如過虎牙灘竹纜穿碑孔磴旋名絞關一艘  
衝波上邪許百夫牽呀然立峭壁攢篙相排連長年端  
持舵萬力使之前往往觸石破一退箭離弦勢危仗神  
道出險皆歡顏祿米資正供輓輸何其艱

報恩寺埕

宮壺資冥福法王棲大乘象獅牢結搆翬鳥忽騫騰遠

勢盤空闊登臨到上層江流如線繞河漢入關凭化覺  
颺輪速階從天路升濛濛但一氣浩浩若無憑潮響宣  
經唄星輝散佛燈莊嚴見羅漢塔塼悉頂禮拜遊僧檀  
越香朝爇摩尼珠夜澂不辭竭民力厯劫煥金繩

夢謁岱廟

昨宵我隨赤松子驂鸞上謁青帝宮翠蕤縹緲神府闕  
仙靈呼吸天門通五更日浴紅杲杲八極氣動青濛濛  
玉几金牀猶在眼盤盤細路白雲封

早行

征衣淨無塵月光如積霰晏息萬戶寂行役傷微賤三

年客京華鬢黑改顏面驅車就長途雞鳴徧郊甸人影  
落平沙西山雲曳練柳色靜朝暎流鶯花外轉回首望  
長安五雲深可見

風雪赴淮

積雪壓茅茨炊烟冷竈觚昔賢艱負米遊子今首途江  
城白皓皓雲樹望模糊寒日淡無光翔風割肌膚鳴鴉  
飽腐鼠枯桑樓暮烏飢聲啼啞啞恐有餓死雛市門散  
燈火昏叩主人廬銅盤燒絳蠟美酒傾玉壺笑語終嘉  
會顏歡時不愉俯仰乾坤大昂藏七尺軀不受衆目憐  
成句翻爲俗事拘窮冬迫歸思白髮方倚閭

詠史四首

管子天下才生稟冉季姿惜不聞大道功烈遂爾卑五尺羞稱霸惟有孔孟宜九合力歸仲五禁會溯葵雖以賢與聖節取不能訾後人託周禮富強安所施

春秋有曹子仗劍劫盟壇一言反侵地盛氣誰能干俠風開戰國高歌易水寒不思祖龍譎生劫擬齊桓圖窮計不就一死謝燕丹將軍悲樊子刎頸餌秦歡有知九原下汗顏見應難奈何燕趙士猶唱髮衝冠

玉檢煥金泥白雲封中起七十有二君刻石盛號紀管子始濫觴漢唐踵其軌遂使阿諛臣請封希上旨昌黎

稱大賢鋪張不讓美雖鬱忠愛忱恐導主心侈巡符柴  
侍宗三年考績始康成引緯書經義奪朱紫卓哉著作  
郎許愆剖析窮原委聖凡兩無取徒爲後世嘗用以昭  
法戒謬誇標青史

梁武窺河洛淮堰乃三築郊原尸枕藉蠅蚋聲相逐不  
聞蠲恤詔但聞禮阿育宗廟薦蔬果慈悲及牲犢愛物  
根仁民斯理未三復姑息養姦慝遂使國步蹙臺城索  
蜜汁佛亦不爲福

有感二首

鳥棲喜林密魚潛畏水清物類求若性蠕動皆有營矧

人靈於物鑿空出聰明一畫混沌眉百憂從此生習深  
天機淺慾逐人事盈安能化血氣無私亦無爭寸心常  
耿耿獨不得其平

山岳亦云壽有時而頽傾人非金石質竟與山岳爭豈  
不憚艱苦一心萬緒榮莊惠有至樂葆光能達生息機  
和天倪太上學忘情

永豐寺梨花

我昔見此樹大抵三尺強

杜句

今我復來遊花開繁若霜

素奪梅蕊豔白益鬢毛蒼我時偕吳子

梅溪

牢落居僧房

溶溶梵宇月懊惱詩人賜利祿豈初願升斗奉高堂浮

名亦何有對花增慨慷  
穠華盛春賞零落同塵揚  
感物有衰謝人事固其常

謁項王墓

啞啞叱咤生風雲渡江而西  
天下分報楚殄秦啓炎漢  
拔山蓋世成殊勳千古霸圖  
昭日月後之議者徒紛紛  
謂王不臣殺卿子一軍能雪  
六國恥當時不捷鉅鹿軍  
天下兵爭未有已謂王殺降  
何不仁青山至今飛碧燐  
豈知虎狼奮長鋌斬艾生靈  
若草芥摧堅陷銳皆爪牙  
假手於王四海快謂王不義  
弑所立鬼神猶應爲王泣  
分羹不忍而翁逋害上反蹈  
春秋誅斧聲燭影留疑案



我謂漢家無董狐謂王不用老臣計鴻門定策等兒戲  
杯酒殺人豈丈夫范增原非王佐器謂王不識執戟郎  
坐失英雄走咸陽信不遇何亦去漢寬仁大度徒鋪張  
而今興亡棋一局賸有河山秋草綠西風蕭瑟捲白雲  
墓門環在萬山曲下馬獨尋人踪稀松濤謾謾野鳥飛  
蒼茫短碣含愁立空使行人弔落暉

感遇十首

馳輝無停晷逝川無停波萬物爲芻狗卽事往已多達  
者觀物化抱道山之阿小智以心鬪煎膏自焚和誰息  
虞芮訟動尋蠻觸戈人生不滿百千歲憂若何委形願

自保老大傷蹉跎

昔遇浮邱公接我蓬萊山  
仙山弱水外奇境杳塵寰  
鏗鏘奏鈞樂排雲列仙班  
天門開誅蕩雲路快登攀  
波濤忽洶湧罡風吹我還  
方壺隔咫尺霞色何爛爛  
迴首謝浮邱仙緣我已慳

旣索胡繩佩又滋九畹蘭  
采摘動盈把興言貽所歡  
美人期不見乃在白雲端  
蹇修不爲理天路何漫漫  
暝彼晨風鳥思飛無羽翰  
有誰感至精獨耿此心丹

空山四無隣拄杖披荆榛  
芳蘭秀幽谷盈盈秋意新  
美人不見采馨香亦自珍  
竊悲鴉鳩鳴眾芳摧爲薪  
無使

隨物化延之良苦辛

雙鵲巢庭樹乃在向南枝得地呼羣侶啁啾滿階墀孤  
飛有鸞鳳雲表弄逸姿豈無鬱彼林弱條難爲棲丹山  
深以阻復值風雪時蒼筤不再實桐子空離離暝彼南  
征雁各有稻梁資徘徊翔千仞甘守歲寒饑野鴟獲腐  
鼠何事轉相疑

人生隨元化倏如過目鳥皎皎明月輪已較盤古小乾  
坤有時息元理誰能了木槿敷丹榮安知大椿老性命  
蘊至精修身苦不早

昔有夸毗子誦法借先賢偶緣儒術進要路據已先身

邀金張貴手握許史權珥筆輦與侍鳴珂車馬填前庭  
集簪紱後堂羅管絃華燈燦明燭雕俎列綺筵羽觴瓊  
漿注吳羹鷓鴣煎美人朱顏醅層波遺視睇齊容起鄭  
舞新聲妙且妍歡娛沈日夜富貴若長年鬼瞰高明室  
物生盈滿愆翟雀門可羅李犬不復牽福輕莫知稱禍  
重伏無端不受天損易無受人益難

眾星如白榆歷歷明蒼昊流輝忽隕落頑然塊石小人  
生物精氣神明乃壽考經綸炳世業文章闡至道奈何  
徇物化靈府日燔爍尸居豢餘氣零落同腐草誰能卻  
五難向秀難菑康養生論養生有五難名利不滅喜怒  
不除聲色不去滋味不絕神慮消散此五難也

願與守三寶慎汝內外捷神役勿擾擾

結繩易書契文明革狃榛渾沌日以鑿淳樸散其眞上古無制作今亦不椎輪增華極周末變本豈無因雖以東魯聖彌縫不能淳智巧競百出文法密以陳天行有石泰豈曰匪由人

吾愛建德國寡慾俗自真耕鑿安食飲無懷葛天民老死不往來安知賤與貧悶悶鴻荒世熙熙武陵春如此自可樂設施亦何因文勝實不至斯意竟誰陳願觀無爲治再覩道化醕

平山口

山繞彭門出巖腰鑿路平雨來千嶂合日射一峰明嵐  
氣侵衣溼雲容傍馬生幽棲堪卜築僕僕愧塵征

登小岱山

西風號古木雲氣忽飛揚登高一以眺萬里莽蒼涼英  
雄長已矣懷古爲感傷遊子意不適興言瞻四方

作客五首

存二

喚紅香土豔東華三月長安飽看花翡翠釵痕迷峽蜨  
珊瑚鞭影燦駟馭連衢甲第榮光重麗日樓臺春色賒  
夜煖笙歌垂繡幙饑聲城上噪寒鴉

四海無家餘故劍三春有淚點征衣斂錢昏阮貧何病

作客依劉計已非頭上青雲看鳥過眼前紅雨亂花飛  
韶光九十蹉跎盡桃李成陰草色肥

顧霽岩過訪話舊晚乃別去掩闕兀坐四壁蟲聲

一燈如豆感賦四首

日暮松關掩花深月上遲空堂掠蝙蝠暗室鎖葳蕤華  
髮流年感青山壯士悲故人勞問訊重與話襟期  
草堂客初去新月映庭柯幾點流螢度一聲宵鴈過天  
寒憐袖短身賤覺恩多繡盡囊中劍乘時發浩歌

白日侵人去秋風起客思空庭吟蟋蟀冷月靜梁思有  
夢懷知己無才答

聖時鄉園驚歲晚花事又東籬

檻外花飛盡天邊鳥數過風塵仍落拓歲月半銷磨小劫龍華重三生鹿夢多阿誰能解脫長嘯破愁魔

虞姬墓

英雄喚奈何蛾眉泣斷首姬能死王姬不朽不觀昔爲楚囚今國母氣燄高張吞劉後千秋尙遺中葺醜九原有知顏應忸

別家怨

明河尙在天殘燈耿房幃行李戒僕夫門外停驂駢遲遲去桑梓惻惻離庭幃顯揚博祿養方歎絕裾非出門



何惘惘稚子牽我衣丈夫四海撫成入口常苦飢及時  
規進取每爲識者譏况以傲世骨詎堪爲人鞿靡靡卽  
長途林表明曙暉

東平州

青山橫郭簇雲峰山盡溪迴見雉墉饗士堂前春水漫  
安民亭外野花濃文章尙說劉公幹宦跡曾傳阮嗣宗  
我亦窮途嗟未達雪泥鴻爪暫留踪

滕縣

有文公問井田處

古廟斜陽裏殘碑傍野滕井曾當日畫邑尙舊名仍求  
治封無小尊賢道可憑圖存非易易仁政到今稱

高唐州

豈有聲相繼我來空復情  
高歌能化俗一藝足成名  
齊右風猶古長途客晚征  
平疇斜落日墀影認孤城

有一老翁

一官龐面濃鬚眉赤旗前導後擁騎與服光爛僕驕恣  
紛紛行人爲趨避有一老翁憇路隅欲爲予言先歔歔  
若翁本是湖海商當年南都會列肆嘗言有子不克家  
十五僅識之無字走馬鬪雞恣所爲冶遊年少相親比  
誰知別來未十年一旦致身青雲地生平不事詩與書  
多半黃金買身貴賤子飄泊走風塵故人有子喜且媿

袖中懷刺不敢投竊恐近前貴人異

除夕感懷

薊門風景過年除爆竹飛聲溢市間百歲光陰蛇赴壑  
千金消息鴈傳書隨身詩卷成良友傍戶梅花憶舊廬  
留滯天涯綠底事辛盤臘酒又春初

天津

風景近

皇州人家萬戶稠地連滄海關日落潞河秋  
羶纒通夷市魚鹽聚客舟巖壑資重鎮擊柝聽庚郵

荏平

長途倦行役，新月見初三。  
燈火明官驛，琵琶引客驂。  
昔賢餘馬宅，治東南十里唐中書令馬周宅秋色滿龍潭。  
杯酒聞歌曲，風塵一醉堪。

登石閭山

爽氣洗塵勞，風聲兩耳颺。  
江河連海闊，泰岱入秋高。  
野鷺猶爭食，蒼鷹快解條。  
會當謝人事，天路聽雲璈。

訪臧益齋

故人幽隱處，春色滿岩扉。  
樹老多烏集，花深亂蝶飛。  
闌扶石笋細，井洗藥苗肥。  
得遂南陔養，人間見綵衣。

灌園在人境，已息漢陰機。  
日午游蜂亂，山深過客稀。  
壺

傾松釀碧盤薦蕨芽肥醉玩溪邊月清風滿釣磯

送行曲

山光青青山水碧送君江南遠作客水淺舟行遲山高  
望不隔願爲山中雲朝出還在夕莫作水中萍風來沒  
踪迹山青水碧自年年但恐君歸頭已白

答牧庵書

礮火莽風雲東南劇楚氛籌邊馳上將靖海於殊勳不  
作和戎議終期滅寇聞况當

清晏日義憤動三軍

鯨魚行

大瀛之東有長鯨紺鬣巨額赤兩睛賣珠往往雜闖闖  
披髮戴笠幻人形復能噴霧毒千里沁人心脾生奇馨  
精華搜盡脂膏竭攝取游魂注鬼兵涵淹卵育盛醜類  
但申海禁寬汝懲誰知跋扈由饕性年來稍稍肆憑陵  
波臣不敢訴眞宰忽乘雲霧思奮興天吳潛逃鼉鼉吼  
水族萬彙從之行頽山駭浪沸崖巒烟雲晦暝轟雷霆  
伏飛猛士多戰死蔽天箭鏃莽飛蝨兵符空傳厭勝法  
伏魔還仗大士靈歎復躍入長江內含沙噴射恣沸騰  
京口萬家成汨沒石頭直指鬣帆輕敵人蛟師不敢取  
爭投羊豕媚膻腥吞噬飽飫揚髻去撇漩跋浪歸滄溟

此物得食聊除伏滔天宜防積惡仍况經飲毒遍寰宇  
中者昏昏疑病醒安得龍伯釣鼈手掣之跼縮如蝦蟇  
高築京觀示炯戒廓清妖孽遼海激

白雲軒存稿卷之一終

白雲軒存稿卷之二

宿遷張偉庚珠南著

夏日村居四首

火雲雜亂山炎蒸鬱戶牖風靜蚊蚋飛時時汗揮手欣  
與素心人招涼到林藪濃綠敷郊疇人家蔭槐柳既觀  
清溪釣復值荷鋤叟歸路烟已暝牛羊滿巷口沙場圓  
如月徘徊望星斗夜深聞露氣不覺坐談久

日入荷鋤歸新月半昏黃披衣藉草坐團團蔭垂楊寥  
天青如幕北斗看低昂輕風動林影池畔生微涼誰家  
收釣艇清唱落滄浪



北軒本間曠幽居况在林時閱金經罷復此一揮琴頗  
得清淨理不復求知音好雨從東來涼風滿松陰散髮  
臥石牀陶然遂初心

長日讀書罷平林日已曛徘徊東廊下矯首看白雲白  
雲幻蒼狗變態何紛紛天空有歸鳥儵然自爲羣對此  
多古意俯仰得所欣

雙堦寺

雙堦湧神臯登臨近斗杓林亭連海淀

宮闕倚雲霄落日山頭靜西風鳥背高扶桑如可接仙  
巖策靈鼈

昆明湖

一色琉璃碧

恩波浩蕩中嵐光侵遠黛橋影落長虹  
聲響菰蒲雨香  
輕杭稻風晴明瞻

鳳闕樓閣半凌空

馬陵秋月

最高峰上再來遊桂子飄香象外幽城郭樓臺都浸水  
湖山霜露不勝秋低看鐵樹千年影遠識黃河萬里舟  
夜半嶺頭笙鶴寂人間何處覓丹邱

題陳忠愍公畫像

白雲軒存稿

卷之二

將軍之軀僅七尺將軍之勇萬夫敵夷帆駕浪窺長江  
一軍防海似鐵壁恩威嚴明軍令肅人思爲用一當百  
隱峴風角知賊來紅旗一颭出死力兩軍奮勇急相持  
千人萬人共一炬烟焰騰空霹靂鳴剝然一聲沉其舶  
天地震撼風雲變竝看成功在頃刻何物書生仗斧鉞  
軍聲誤聽無人色援兵不救敵大至蜂屯蟻聚戰益劇  
礮石忽中將軍臂肉飛淋漓血光赤手持軍麾急號召  
猶聞大聲呼殺賊捐軀報

國男兒事坐失機宜咎誰職我今展卷瞻遺像英姿颯  
爽戰鬚磔

西村

西村一老翁鬻犢過鄰牆借問鬻何爲城中輸官糧自  
云生七十少小事農桑憶昔乾嘉年時和歲屢康吾鄉  
納折色銀與錢相當催科雖嚴急官民兩不妨側聞開  
夷市設關通海洋鴉片忽流毒白金價日昂以今校疇  
昔相倍弗能償因之民重困偶歉有逃亡言罷牽牛去  
沈痛迫中腸春耕勿復道且醫眼前創

桃源縣

土窟茅檐綠樹遮漁舟晚泊釣竿斜舍南舍北皆環水  
春去春來不見花一片湖光搖白日無邊風色捲黃沙

多愁平子渾無事買醉聊將濁酒賒

重遊鄭曲

白日門常掩藤陰一架低花飛隨水去鳥熟向人啼藕  
榭凝珠網書樓落燕泥當年觴詠地三徑草萋萋

訪錢樾坡茂才

風花吹片片相訪到晴郊春水鷓鴣堰深林鷓鴣巢故  
人一杯酒文字十年交談話終今夕垂楊月挂梢

初秋桃源早發

炎夏居城市有如鳥在籠一雨滌殘暑歸興及秋風瞻  
星出郭門清景愜幽衷萋萋冒新碧荷葩褪粉紅高林

迎旭照露氣滿芳叢誰家下釣艇清唱入波中

幕府

幕府開雄鎮東南物望尊清風列霜戟旭日照轅門節  
鉞盛僚佐宣防重翰蕃停陰飛鶴蓋接軫駐熊輪鈴閣  
啟文讌華筵邀鄭賓罷觥簇峽蝶梁棟散星辰座倚珊  
瑚樹春濃琥珀樽仙廚出鸞脯玉膾割龍鱗侑酒彈銀  
甲當歌啓絳脣綺綃烟霧薄花鈿麝蘭薰頌德多才士  
爭妍任美人經綸展安晏黜陟握陶甄富貴眞行素恩  
榮邁等倫台衡會秉軸要路自通津粉署蜚聲早金隄  
著績頻內衙膺寵錫莫作畫麒麟

遊王氏倦圃二首

一亭新結構，俯郭出塵氛。  
鳥影窗中落，河聲枕上聞。  
池深堪貯月，山小不藏雲。  
獨占林巒趣，翛然與鶴羣。

微雨新涼早，池荷尙有花。  
小橋低跨水，老樹半藏鴉。  
樓敞芸香出，亭虛桂影斜。  
登臨近河漢，圃有浮槎亭，望河流如環，足底便

擬訪仙槎。

懷南陵葉小山

我昨訪子山之陘，石危苔滑路冥冥。  
殘月斜照江水白，浮雲不隔陵陽青。  
十年舊雨徑初闢，一燈老屋門常扃。  
覺來清風滿懷抱，蕭蕭落葉敲窗櫺。

雪中歌

林桑號風山岌業河水霜皓雲埋破清角破曉關門牖  
茫茫原隰望押搗空山處士籬壁押僵眠如龜鼻息豁  
醒來晃然鏡開匣清氣如許心神押戀頭破帽著綿恰  
蒙茸敝裘煖肩胛不愁竈冷炊烟乏跨驢探梅情恰恰  
銀海漫漫炫目眨酒旗不動蘆花壓松柯偃寒竹枝爽  
著物還如小雨霏路斷前溪岸縮鴨畏寒鶴欲與人狎  
絮捉兒童易沾袷花摘美人難入指堆成小山月穿峽  
化作時霖待春洽買醉漫荷伯倫鍤坡公白戰猶堪法  
分箋不許寸鐵拔號令森嚴守令甲



春日旋里二首

已過春分節田廬樂事賒  
小奴閑插柳嬌女學栽花  
書暖初成服泉新細碾茶  
柴門無客到但聽鳥聲譁  
故里頻年別清明卻在家  
松楸先隴戀釣弋舊情賒  
村舍新淘井鄰牆漸落花  
不勝今昔感斑鬢惜芳華

雙溝鎮

夜泊雙溝鎮依沙兩岸平  
天低遠樹盡月傍孤舟明  
身世餘書卷艱難仗友生  
有懷愁不寐計日數歸程

孤鶴吟

并序

何學博某號柳橋東台人年三十二喪耦有子二人

次復中殤或勸之娶君峻郤之教子讀書補博士弟子員授以室委家事焉晚年以明經就教職歷署江甯教授六合桃源訓導暇卽攜襪被寓維揚徜徉山水若不與人間世者孟城陳時升孝廉爲序其事並誌以詩屬和於子子因之有感焉俗之偷也有朝喪而暮婚者矣有孫枝繞膝而猶謀娶婦者矣大抵男子情鍾少艾從來後母絕少慈雲此伯奇所以有野放之歌義方所以有黑心之符也予從父佩行先生行年三十有四喪室有勸之娶者先生曰高宗吉甫事會子猶懲之余何人無其德而效其行乎遂終身

不再娶其志行與何君有適相符者因並識之作孤  
鶴吟

有鶴孤飛集于河洲之子獨處沙焉寡儔一解有鶴孤飛

集于林邱之子獨處勁節若秋二解月缺則圓鏡破則分

呱呱子遺夜臺不聞三解袞師婉孌童烏又殤寒岩枯木

淒其隕霜四解豈無色絲非我故機亦有姬姜德音孔希

五解攘瑜自臭掇蜂自毒前事不忘照炯于燭六解以父代

母孤燕將雛寒煦飢哺子口卒瘡七解稚子能文言采其

芹授室著代庶慰恩勤八解子拜于前婦拜于後酌以大

斗祝翁壽耆九解飲冰茹檠克昌厥後諷世礪俗維義之

厚十  
解

閉戶

閉戶耽寥寂幽居寡送迎游觀識物趣  
从客諳人情靜  
與慵相習名緣病益輕長吟不知苦獨結此心盟

秋風

秋月照牀前秋風悲楚天不堪搖落意使我百憂煎  
宇  
宙何寥闊生涯太局卷誰能徒旅食會訪紫雲仙

秋燕

問爾梁間燕相依能幾時久留非所計欲去竟何之處  
處憐飄泊年年悵別離莫愁春社晚有客伴遲遲

澤國

澤國頻年住人家野岸邊孤村斜落日秋水遠連天縣  
僻常休市漁多晚聚船沙鷗仍泛泛白鷺去翩翩

南村

落日滿漁梁孤村野水傍溪頭翻烏白屋角綴瓜黃晚  
稻猶棲畝秋禾已築場年豐供客醉留取注糟牀

秋日雜興三首

不堪身世等浮萍落日敲窗旅夢驚萬里秋風送征鴈  
一天涼雨暗孤城客邊賸有親知問老去漸增兒女情  
何日向平畢昏嫁登山臨水杖藜輕

蒼蒼雲樹隱三台

闕名

湖上孤帆天際迴日射殘虹收雨

霽風清旅鴈帶霜來漫愁白髮參差見且喜黃花次第  
開身際太平無一事空山擬剪故園茶

洪湖秋水遠涵空日夜河聲走向東大野雲低吳將壘  
夕陽草沒楚王宮林邊暮鵲爭高樹天外飢鷹下朔風  
露白葭蒼驚歲晚伊人消息寄征鴻

重陽二首

九月九日天雨霜遊子無情作歡場紅葉半林醉人眼  
黃花到處惱客腸楚山楚水征鴻斷秋雨秋風落木涼  
惟有阜雕矜意氣孤飛萬里莽蒼蒼

滾滾河流去不回  
星星霜鬢暗相催  
此身於世終何補  
作客逢秋亦可哀  
誰翻人事新花樣  
獨抱生涯故紙堆  
四十無成猶浪跡  
山川望遠日悠哉

奉酬陳幹生見贈作次韻

我非孟浩然甘爲時所棄  
以文博青紫亦覺了不異  
簡鍊爲揣摩及鋒期一試  
誰知戰屢北春風困旅次  
豈無推轂人空灑知己淚  
功非可倖成身反爲名累  
回思角逐場萬魚貪一餌  
亦有捷足才探囊取攜易  
遂令白屋彥益勵青雲志  
我亦再發憤孤軍張異地  
外無蟻子援中有萬鐵騎  
十盪復十決中堅攻所備  
垂成忽取敗信

非人力至決計舍之去風塵日顛顛長卿著憤鼻幾與  
市賈類鹽車上太行麒麟甘所事千里困咫尺焉識造  
物意忽逢陳仲弓一洗俗眼忌有如黍谷寒回春納暖  
吹慰我敗北辱破我中疑貳苦口施藥石中心爲強記  
但恐樗櫟材雕鑿不成器願君飛騰入奪標先拔幟神  
化出丹青用致星雲瑞拔茅以彙征斯意吾久寄

題杜工部集

獨得渾淪氣包羅萬象中直將泣真宰不但屈文雄事  
可補唐闕詞猶驅鬼工能開前未有餉後自無窮

題韓昌黎詩集



不但文章盛狂迴八代瀾一枝搖嶽筆五字樹騷壇燥  
鍊精光出橫空硬語盤清心領妙易生面獨開難力破  
無餘地篇成得鉅觀文昌真氣在尙觸斗牛寒

讀杜再賦

當日唐天寶開編在眼中玉魚矜內寵金虎泣孤忠藩  
寇氛難靖君王塵再蒙憂時兼恨別每吐氣如虹

春遠

芭蕉蔭綠到簾櫳賸得殘花數朵紅屋老寒侵燈影外  
鶯啼春盡雨聲中名高真覺文能達才淺翻疑詩助窮  
寄語少年須努力漫將憔悴怨東風

聽湛雲釋彈琴

掩關梵宇靜霏香  
開白蓮湛雲抱綠綺爲我一揮絃  
松風生遠巖岩洞滴乳泉躡足無人境  
游心太古前  
嗒然喪其耦兀坐如枯禪  
清商忽入奏搖落悲空山  
瀟湘洞庭闊孤雁叫暝烟  
湘妃泣幽竹清風颯迴旋  
餘音斷復續意與致纏綿  
哀怨不自知境過益灑然  
開戶望明月疎星滿涼天

土城

土城如覆甌復受河湖鬱一觸蛟龍怒將成魚鼈窟  
家家架木柵藉以備倉卒去秋有謫言河水灌城闕  
家書

驚問訊骨肉心惛惛我胡久居此處堂忘艱脆白雲滿  
空山清風對涼月何不歸去來結茆在林樾

移居三首

焦螟巢蚊睫安棲若衡宇鸞鳩宿一枝亦自偕其侶恃  
此屋數椽聊以庇風雨竊聞比閭言宅已三易主百年  
物大齊天地亦廬旅我本飄泊人容膝易託處焉用歌  
輪奐頌禱祝來許置酒勞近隣春色滿庭戶

春風吹庭樹新綠到牖戶葡萄發舊枝李花亦漸吐萬  
物含新意渾忘生事窶灑掃虛室塵驅除鳥與鼠短榻  
位琴書頽垣任環堵我生無長物真樂在稽古寄語兒

童知斯意非懷土

喜鵲噪庭除兩兩相對語戚友攜酒來情話亦縷縷藉  
作片時歡盡醉忘賓主客散月臨軒清光白如許我心  
無一物著足卽安土願與素心人讀書深閉戶他年洗  
車塵便號處士塢

白雲軒存稿卷之二終

白雲軒存稿卷之三

宿遷張偉庚珠南著

春日途中

昔我歸來時柳穉青始吐今我出門去桃紅花落雨東  
風纔幾日春光已如許造物本無私韶華亦誰主俯仰  
天地間不禁人領取清唱誰家子青溪弄柔艣

題王甘岩南遊詩卷

九州亦彈丸數月可遍履司馬能文章亦自壯遊始愧  
我牽塵網終年磨行蠟誦子南遊詩山秀忽落紙太華  
插金天清虛絕渣滓爐冶劑剛柔寒鋌斂秋水兩間渾

淪氣叶入宮與徵古瑟久絕彈新聲但盈耳萬象涵眞  
意誰人剖斯旨我將邀子去片帆犯南紀淨澡峨眉雪  
一窺浣花壘

夜坐

清風吹殘暑小院覺秋早天空捲片雲露洗月光皎樹  
影交枝柯安巢隱栖鳥妻孥相團坐頗足慰枯槁動靜  
理互根欣戚情可了數年風塵色今夕一爲埽靜觀集  
夜氣空洞萬慮杳

淮黃歌

黃水高濤水低水衡百萬培金隄高益高海口黑沙如

鐵牢低復低湖脣墊入黃河泥

道光二十九年七堡洪口湖身再淤淮漸北徙

淮弱河強失古制蓄清敵黃五壩閉五壩閉上游漂沒  
爲民厲五壩開下游膏壤成污萊自來九尺足敵黃今  
已二丈三尺強湖河若策救時弊以清刷黃別無計

### 放歌

我生不願肘懸金印大如斗虎飛食肉封公侯亦不願  
爲猗頓陶朱富敵國田連阡陌宵持籌但願一邱與一  
壑耕烟種樹山之陬三間茅屋任埋雲一犁春雨聽啼  
鳩新穀旣登田歌洽燔魚沽酒呼朋儔蠟屐看山忘遠  
近騎驢覓句還唱酬室有琴書供嘯咏門無車馬饒清



幽誰知此願竟難遂卷卷翻似服輓牛辭家阮瑀仍記  
室依人王粲賦登樓殘杯冷炙作客場楚水吳山行路  
悠塵世動遭俗眼白風霜做盡蘇子裘造物富貴不靳  
人華陽之犧金終頭厚祿非供榮官具致身要有經國  
猷閔叔投劾甘枯槁荀恁散財歸山邱詭時審己各有  
分滑泥隨波心所羞會當高舉尋吾契人間榮利焉足  
求

中台

星色隱中台重陰鬱不開雷霆忽震恐雲漢剗昭回  
明燭丹青地庸登元愷才望譏凜

威福讀

詔快挺咳

時平二首

時平多游手三耕供七食田主收其半農人益困隄終  
歲營一飽往往有菜色城郭誰家子在官面無鰲酒肉  
饜妻孥何曾識鋤犁

寒女機上絲寸尺累艱劬文章辨等威上供國家需工  
多物徵賤衣及輿臺軀犇燈鳴軋軋月得四十五賣縑  
換米薪飢聲啼兒女北風刮肌膚身上無完縷

送張詠仙明府之隆平任

出學博升

文章絳帳頻延士風雨黃河數舉杯老友鄭虔賦歸去  
宰官潘岳喜重來千秋早富傳經業百里甯論作吏才  
聞道三賢堂宛在還將徐榻禮蒿萊

望淮歎

西風吹駭浪欲濟無舟航滔天盪白日浩浩同懷襄百  
萬漕東南連檣貢

天倉南

巡廛

聖慮區畫深周防五壩時宣洩恐降下民殃何期百年  
後改變如滄桑坊川有潰決道光六年河流日益強挽

牽藉人力挹注名灌塘豈足計長久權宜資輸將濁流  
再填淤淮弱不敵黃計惟重堵閉蓄水費用周章遠波浸  
徐泗一簣障淮揚田廬多漂沒哀鴻嗷且翔臨風祝支  
祁慎勿逞強梁

送吳仲仙明府由桃源升任二首

豈無蕭睦似前賢

蕭與睦前任  
桃邑賢尹

極目傷神百里間滿地

河湖颯沙渺通衢幽薊車班班民多回部俗風陋田付  
波臣生計艱一自故人工製錦桃源物色漸春還

相如屢在臨邛駕子美長吟求友篇澤國窮途甘賤役  
琴堂徐榻愧高懸湖河爭地民安堵風雨壓城客穩眠

始信賢勞資保障焉能借寇再經年

短歌行

騏驎不展千里足亦同凡馬空多肉黃鵠一飛徧九都  
天寒日暮隨野鷺自來賢俊困泥塗漁鹽屠釣不醉辱  
我今康伯依囂市閉門奚啻在幽谷塊然獨處守蓬蒿  
萬丈雄心何由伏途窮不是無心人短歌微吟聊當哭

久客三首

久客思歸尙未能溪前閒煞打魚聲名途早似收韁馬  
旅况還同退院僧半榻烟餘燒藥竈一窗秋老讀書燈  
重嗟筋力難強健回首風塵白髮增

桃源春色到花朝作客十年甘縵袍  
繭吐蠶絲還自縛泥銜燕壘不辭勞  
杜陵妻子丹砂誤湘壘詩詞白雪操  
何事盛名書竹帛久拚身世老漁樵

茫茫風色暗塵沙隱隱仙源綠樹遮  
萬里河流馳竹箭一城春水潤桃花  
溪邊舊路通漁艇天上故人迴使車  
已分山中成小草此身那得更無家

成句

### 感事五首

粵西殺氣徧巖阿焚劫沉寃釀患多  
姑息竟同梁叔達紀綱無復漢蕭何  
星馳上相初專閫血戰將軍尙枕戈  
聞道永安近乘勝轅門乞命慘么麼

見說中丞策鶴鵝紛紛寇盜願投戈人欣

魏闕用元老誰分蠻方哭伏波六詔風烟聞凱唱三秦  
霜雪動哀歌空中甲馬瞻星象未埽欃槍遺恨多

細柳營中星使過

九重

恩詔返岩阿祇緣小醜黃巾著轉益元戎白髮多深入  
孤軍規地利重申大義得人和米山妙略資辰告會見  
蠻方早息戈

將軍膽力爾誰過見賊身輕夜負戈驍勇如飛漢李廣  
威名遠震趙廉頗短兵殺敵無聲出單騎衝鋒制勝多

會埽妖氛靜南服

九重春色聽鐃歌

詔頒堯典沛

恩波

聖主憂危

受諫多不謂方隅擾白馬更教風雨潰黃河塞門未唱  
刀鑿曲漢室重聞瓠子歌百萬司農籌

國計諸君何以佐時和

秋日旋里偕臧牧庵小飲因贈

蕭蕭白髮將軍客甘作深山避世翁尙有俠懷如劇孟



每勞微使到元戎兵談玉帳風雲變經述韋編造化通  
垂老故園一樽酒還將元理問揚雄

粥

畸人甘淡泊每飯必食粥今年淮米賤販鬻連舟軸紅  
鮮光散霞白鑿潔比玉輒滑甯留齒甘溫易果腹脫粟  
與濁醪杜陵願已足况我不田作旅食混儒服安敢恣  
饕餮既飽還思肉豪門飫腥羶窮檐餒半菽穀賤大傷  
農醫瘡仰空屋終歲飯不飽粲粲空悅目因思漕東南  
遠貢

天倉粟河渠易阻滯十千致一斛持梁齒肥者何以慰

幽獨

和王甘岩金陵雜詠

水榭紅闌亞波光一鏡明舟搖殘夢影魚聽細歌聲金  
粉六朝豔風花三月晴豪華未銷歇蘭漿倍含情  
當年雙燕子春去入誰家賸有湖邊藕還開鏡裏花漁  
歌晚烟出客思夕陽斜回首石城路垂楊已噪鴉  
天入蒼山好野花一徑開清風來竹樹春色上樓臺作  
吏無多日斯人未易才烟霞藏著述吟眺獨徘徊  
巖洞泉珠滴茶烟熬野爐餘甘分佛露清味帶雲腴花  
雨殘僧跡松風灑客輿娑羅空有樹無地契眞如

興廢關天意漫云人事疎驚心飛燕子劫運到扶輿義  
正春秋例文嚴斧鉞誅青峰埋十族齎恨滿山隅  
把酒鳳凰臺高吟亦可哀青山空伴客明月解憐才放  
廢尋瑤草生涯問劫灰詞壇餘壁壘雲漢尙昭回

言志十三首

集陶

弱年逢家乏夏日長抱饑投耒去學仕寥落將賒遲崩  
浪聒天響風水正乖違遙遙從羈役如何淹在茲素願  
斂光潤寒氣激我懷慷慨思南歸人間良可辭

日暮天無雲素月出東嶺冉冉星氣流蕩蕩空中景清  
風脫然至不眠知夕永奄出四十年有志不獲騁酒云

能消憂揮杯勸孤影久遠戀所生終曉不能靜

庭宇翳餘木中夏貯清陰虛室有餘閒臥起弄書琴慨  
然念黃虞真想初在襟咄咄俗中惡遙遙沮溺心傾身  
營一飽過足非所欽息交遊閒業聊用忘華簪

少無適俗韻心念山澤居春秋多佳日浪莽林野娛飢  
來驅我去登陟千里餘慷慨憶綢繆歲月共相疏去去  
當奚道縣縣歸思紆人事固以拙終返班生廬

初與君別時渺渺孤舟逝爲事誠殷勤未言心先醉情  
欣新知歡目倦修途異紆轡誠可學恐此非名計立善  
常所欣達人解其會歲月不待人及時當勉厲

憶我少壯時，猛氣充長纓。騫翮思遠翥，臨流別友生。荏苒經十載，飢寒飽所更。世俗久相欺，人人惜其情。志意多所恥，淹留遂無成。如何蓬廬士，但願世間名。

彈冠乘通津，宛轡息通衢。時來苟冥會，暫與田園疏。駟馬無賁患，榮華難久居。古時功名壯，身名同翳如。商歌非吾事，胡事乃躊躇。寢迹衡門下，時還讀我書。

仲春遘時雨，草木縱橫舒。春燕應節起，雙雙入我廬。種苗在東臯，披榛步荒墟。衣食當須紀，過此奚所需。縱浪大化中，客養千金軀。若不委窮達，規規一何愚。

平疇交遠風，遠屋樹扶疎。閒居離世紛，委懷在琴書。故

人賞我趣過門更相呼漉我新熟酒摘我園中蔬談話  
終日夕未忍言索居感物願及時不樂復何如

新葵鬱北牖幽蘭生前庭地爲罕人遠園林無俗情烏  
唳歡新節氣和天惟澄逍遙蕪臯上依依在耦耕人生  
歸有道孰是都不營養真術竚下聊復得此生

逝止判殊路甘以辭華軒我願不知老守拙歸田園方  
宅十餘畝悠然見南山帶月荷鋤歸斗酒散襟顏田家  
豈不苦庶無異患干正爾不能得心在復何言

陵岑聳逸峰啟塗情已緬虛舟縱逸棹山澗清且淺迴  
澤散遊目冷風送餘善班班有翔鳥厲響思清遠指景

限西隅歡來苦夕短黃綺之商山悠然不復返  
嫋嫋松標崖孤雲獨無依我實幽居士稟氣寡所諧自  
古有黔婁高風始在茲三旬九遇食當暑厭寒衣豈不  
知其極投義志攸希稱心固爲好違己詎非迷

寄王甘岩二首

集陶

榮榮窗下蘭藹藹堂前林王子愛清次聊用忘華簪清  
謠結心曲神鸞調玉音擺落悠悠談懷古一何深高舉  
尋吾契眞想初在襟得歡當作樂古人惜寸陰

仲蔚愛窮居蕭索空宇中了無一可悅賦詩頗能工悠  
悠東去雲淒淒歲暮風遂盡介然分所樂非窮通故人

賞我趣止有一劉龔抗言談在昔聊得長相從

遊仙三首

集陶

玉臺凌霞秀館宇非一山杳然望扶木白雲宿檐端天  
容自永固王母怡妙顏靈化無窮已不知幾何年翩翩  
三青鳥八表須臾還我欲因此鳥路遐無由緣

衛生每若拙我去不再陽世間有松喬壽考豈渠央丹  
木生何許瑾瑜發奇光豈伊君子寶食之壽命長誠願  
游崑華員邱足我糧方與三辰遊萬歲如平常

粲粲三珠樹落落清瑤流西南望崑墟是謂元圃邱願  
言躡輕風及辰爲茲遊靈鳳無雲舞光氣難與儔亭亭



明珩照迢迢百尺樓逍遙蕪臯上吾生欲何求

贈查琴山

集陶

與子相遇來淹留忘晷晨言笑無厭時益復知爲親孟  
夏草木長卽事多所欣斂襟獨閒謔今朝復斯聞問君  
何能爾靈府長獨閑伊余何爲者白髮一已繁屢空常  
晏如在己何怨天久在樊籠裏聊且憑化遷世短意常  
多安得不爲歡清歌暢高音鍾期信爲賢

洪澤湖

江淮河濟天四瀆周流血脈同人軀如何障塞成巨浸  
汎濫千里無田廬預籌水弱不敵黃得毋體

國心區區豈知奔走啼婦嬰浩浩滔天民共魚支祁蓄  
憤老龍怒蛟飛鼉吼凌空虛風雨晦冥鬼神駭官民捨  
護聲號呼一旦潰決不可收頽山駭浪輪尾閘三壩再  
築功不就昔日望洋今杯孟湖田流民盡復業青青禾  
麥連村墟今年漕艘載載來淮河膠淺生菰蒲開河引  
水水退縮大府焦灼飛星符不觀蕭梁築淮堰三築三  
決勞民夫物極必反乃天道膠柱鼓瑟宵旰圖我願蓄  
水歸舊制恪遵

廟謨永勿替五壩以時資宣洩官漕民田自兩利

白雲軒存稿卷之三終

白雲軒存稿卷之四

宿遷張偉庚珠南著

豐北歌

豐北決兮河紊流隣國爲壑兮浩浩浮浮灌微山兮注  
駱馬泛濫溶滄兮傷農稼農稼傷兮奈何蕩析離居  
兮慮殫爲河勤

宵旰兮憂吾民河公降酷兮何不仁魚鼈竄兮蟄龍徙  
離常軌兮水爲隄

蟻穴潰隄兮咎誰職萃萬力兮歲寒柏美玉湛兮牲告  
虔九龍降兮形蜿蜒菑石礎兮長筭舉漩渦汎兮深如

淵深如淵兮流不平  
鳩功易祀兮工用弗成  
金擲虛牝兮弗敢愛  
默佑

昌明兮神哉沛水歸壑兮大瀛東  
萬福來同兮河伯官

愁霖歎

盛夏羲烏匿陰陽氣或亂  
祝融失厥職元冥權僭擅  
浙瀝逾旬月陰蒙錯昏且  
震雷撼梁棟激電爍霄漢  
泉響喧檐瀑水光漾里閭  
街衢通舟楫禾黍浸波瀾  
淒清謝締裕沈溼斷炊爨  
江戒多淫潦比年水荒游  
天地豈無心昏墊爲民患  
或者水懦象藉以警積玩  
安得誅雲師羣陰消見  
睨陽煦物壯堅秋成遂農  
願

聖主念民艱

憂勤惕宵旰賑施亦已勤能盡免流散燮理三公職玉燭調

清晏草莽有何知悄悄私心愴

晚歸

喚渡斜陽裏輕風舴艋舟鐘聲山寺晚霞影水天秋歸鳥翔沙嶼飛花繞荻洲星明望漁火犬吠一村幽

奉酬王仙洲見贈原韻

太息窮黎汜小休嗷嗷鴻雁徧中洲宣防不救民魚患戰伐空深峒虎憂千里驚秋從作客四方多難怕登樓

年年旅食真無那，羨煞居鄉馬少游。

奉和王仙洲邀遊城南看菊花韻

霜風佳日暗相催，步履農家野岸隈。  
小徑重來經水漫，好花依舊向人開。  
劇憐泛酒甘陶隱，誰解餐英痛楚才。  
賴有牆東邀伴侶，往還幾度帶香回。

撥悶

返照蘆花白，江天萬象虛。  
草枯鵬挾兔，水落鷺窺魚。  
歲儉分隣米，時艱急羽書。  
三年聞戰伐，衰謝獨躊躇。

春歸

中歲不得志，萍飄湖海深。  
常懷紫芝客，結念白雲岑。  
溪

水迷歸路桃花已滿林孤舟杳然去明月洗塵襟

感事二首

承平昔恬嬉民久不知兵紅巾一倡亂所過無堅城長  
沙有故人守禦著能聲

謂張石卿中丞

七攻計不就北竄鋒莫

攫大江據天險虜艇揚帆輕漕帥爲退守淮北風鶴驚  
袁江扼南北險要無其形賴有吳賢尹

仲仙

政肅令惟行

隱如一敵國民心庶稍甯我兵二十萬勢壓秦嶽傾  
朝廷爲肝食小醜何縱橫諸君多幹濟何以答

昇平近聞向將軍百戰洞賊情妖氛期迅掃會見江介  
清



陽春三月時，凄緊風號木。黃雲復四塞，陰氣何慘黷。省垣一失守，土賊亂山谷。剽奪當孔道，殺人日不足。我時有戒心，買舟大河曲。路無人行跡，村餘破茆屋。不見桃花明，但見桑枝秃。白骨侵野草，烏鳶饜人肉。大陵積尸氣，疫癘萬家哭。里門訪親舊，半已登鬼錄。比年水荒游，人不飽半菽。吞聲賣兒女，忍待二麥熟。天心自仁愛，人事有傾覆。物固忌太盛，降災亦云酷。

哭亡女

有女名玉秀，牙牙露幽姿。生小頗聰慧，誦得老夫詩。操筆描鸞鳳，桃梅花綻枝。私念阿爺貧，素粧洗鉛脂。伴母

習家苦餘事及詩棋繞膝雖非男慰情忘衰疲無何捨  
我去年命促汝期我時客淮濱道阻不得歸瘞汝北山  
岡聞在仲春時艱難至里門觸目情悽而汝母病在床  
汝弟面黑羸數椽破茆屋竈婢供晨炊淒涼焉可說垂  
老傷此離何處招汝魂悲來不自持

絕句九首

九江失守無完壘金陵將軍巷戰死可憐四千駐防兵  
血作秦淮河上水

正額四千閑散及家屬  
不下萬餘人盡沒於賊

空詔知兵房次律我軍三千敗何卒青燐白骨莽蕭瑟  
至今國人哭師出

健兒競逐風塵起摸金都尉剽行李鄉勇充募名絕假  
探丸殺人白日裏

揚州半載未解圍爲有元戎畫上策賊人運米歸城去  
我軍彎弓不敢射

節麾防堵在徐泗遠隔賊營數百里挽弓馳笑皆驍雄  
日逐狐兔空山裏

紛紛逃勇幸免死解脫佩刀飲都市卻喜風塵兒亦得  
歸來身上有紈綺

大兵十萬剪羣醜孤城困守已持久竊虞師老財易匱  
注目江天日迴首

北方健兒好身手意氣吞賊復何有自言食祿及三世  
丈夫垂名當不朽

將軍百戰賊卻走孤城負固爲死守聞說金陵不日復  
一洗乾坤正九有

贈葛杏涓巡檢

葛侯富才華屢試不一第相見淮濱道卑飛不得意志  
士多苦心况值干戈際賊氛厯三載節帥專閫寄九江  
一失律所在生烽燧維揚亦重鎮長江扼形勢愚哉江

壽民醜金豔以利欲活萬生靈襲此媚夷計

嘆夷犯順  
壽民以重

賂款夷揚  
城獲金

開門揖盜入殺戮及童穉

賊有童子軍每  
戰使居陣前神

白雲軒存稿 卷之四

五

燈照路衢

賊以神像置街巷裏以紅巾插長柄燈籠於手照路

開貌賜將士

賊選色有

不中者賜與將

士謂之開貌 維時陷賊中倉皇爲走避骨肉幸存活

遠問委箱笥且効府中趨一命屈小試花縣有茂宰練

勇資捍衛書生抱杞憂旅食寄淮市一遇盡殷勤爲我

話顛顛桓桓向將軍三軍蓄精銳嵎虎雖假息捷音已

累至應看鏃賊壕廓清大江介君才固傑出盤錯別利

器柘棘甯久棲會展凌雲翬

錢槭披攜眷寓桃源鄭曲信寄因贈

聞君攜妻子已隱桃花源我亦馬陵麓將謀二頃田躬  
耕以自給心無塵慮牽碧蘿挂秋月山澗鳴清泉興來

時獨往花落白雲眠與子成三老

杜句人或疑偃佺

道路逢流句

飄風吹斷逢飛揚散廣川鴻鴈謀稻梁哀鳴向南天道  
路逢流句辛苦爲余言本家六塘曲頗有桑麻田黃流  
一再決蕩沒無遺壓攜家遠覓食鹿車共挽牽朝飲河  
中水暮栖村樹烟膝下兩小女白皙嬌且妍割愛幸存  
活鬻之錢六千瀕行不肯去嗔怒使之前一步再回顧  
沉痛摧心肝小男纔六歲面垢衣履穿身小不能行載  
之炊金間積熟釀秋雨泥溢途迤邐黃昏村戶閉元蛇  
盤樹巖索飯任兒啼且就沙中眠飄飄無根蒂終恐死

道邊一夫勿失所

懷保切痾瘵運米三十萬爲救民顛連誰爲司牧者南  
面方赫然水涸民復業忍待陽春還

秋日旅邸讀青蓮集偶成

長江寫皓月萬里涵碧空片雲天際來兩兩白玉童

李句

仙人朝北斗手把碧芙蓉縹緲九霄上笙簫落天風我  
願從之遊星宮訪赤松身佩豁落圖青天騎白龍

李句安

能從人世擾擾如飛蟲

哭亡友晏宗望

時宰垣曲賊至被戕

晏宰吾良友溫溫圭璋比弱冠能文章聲名頗濟濟一

踏京華塵茹苦甘如薺十載得一官青雲發軔始四境  
如太古肅肅有治理飲酒雁士元斯才豈百里紅巾肆  
竄擾倉猝被戍死守城甯無術將懦兵無紀淮南望白  
雲惻惻心不已一死自千秋終傷失知己

飛黃

薰風調玉軫五龍騰唐衢德水呈元甲九駿馳文塗由  
來帝王興神運開皇圖飛黃崇上駟汗血產神駒買骨  
昔所尙厯塊今豈無奈何策駑駘老戀棧中芻縱諸鸞  
和步甯知千里紆伯樂不世出九方亦榛蕪曠代論賞  
音悲鳴祗蕭疎



觀物篇

鴻鈞陶萬類乘除不自知去角與以齒分定無或差鳧  
足與鶴頸短長各有宜小智妄穿蠶蠅營徒爾爲卽鹿  
无虞人觸籓羊角羸求益或成損欲速反見遲龍蛇輕  
動蟄吉凶悔吝隨智者淡無欲達人安所雌不觀山梁  
雉飛集惟其時

聞笛

花影移闌露氣清畫屏無睡忽聞聲宵深小院人初悄  
風定高樓月倍明已抱年來漂泊恨頓教感入古今情  
最憐遲暮空山裏千里相思一夕生

雜詩三首

我有素羅衣鮮明如霜雪一朝經梅雨斑斑成緇濯  
以江漢水百澣不能滅棄置在篋笥空悲素質潔

山中有璞玉韜光何渾堅一朝鑿爲器虹采生几筵玲  
瓏非弗貴無乃質不全守眞以所尙默契道德篇

人爲有情物情多性乃鑿無端增愁思有時恣歡樂歡  
樂顏常好愁思令人老此心無倚著情緣應盡埽

偶成

殘漏無聲簾幙垂窗紗破曉生虛白爐溫香燼客眠熟  
掃地開門雪盈尺石鐫茗椀鶴同清一枝寒梅供小摘

忽聞剝啄扣柴荆時來蔡老談詩客

春日懷朱雲村

時慕甘泉

門前柳色漾溪流鎮日垂簾不上鉤  
春雨杏花烟水闊東風吹夢到江樓

風人

風人刺蜉蝣伐輻懲素餐不觀耕織苦農桑  
有飢寒淡泊乃天道淫靡實人患游民無丁課浩蕩

聖恩寬逐末競錐刀往來車班班生恣鮮美情游財  
易殫豪強事微逐法令豈勝殘時平多盜跡每嗟行路  
難浮俗何由挽撫時增慨歎

挽張詠仙木令

集陶

長公會一仕願盼莫誰知慨然念黃虞稟氣寡所諧彈  
冠乘通津束帶候鳴雞立善有遺愛常恐功愈微有志  
不獲騁奄去靡歸期雖留身後名惻愴多所悲

負杖肆游從情隨萬化遺鼎鼎百年內縱心復何疑如  
何捨此去巽坎難與期才華不隱世懷此貞秀姿彈冠  
佐名洲寄聲與我諧遙遙望白雲長風無息時在數竟  
未免舉目情悽而游魂在何方懸車斂餘輝

登最高峯

集陶

吾生夢幻間如何辛苦悲一形似有制違已詎非迷誠

白雲軒存稿

卷之四

九

願遊崑華汎隨清壑迴青松冠巖列白日掩荆扉世間  
有松喬千載不相違

聽泉圖爲王甘岩題

奔流灑落出層峰一洗千秋壘塊胸隔斷紅塵三十丈  
四山青抹白雲濃

小隱人間有謫仙桃源洞裏醉堪眠聽泉偶被雲留住  
洗盡塵根五百年

白雲軒存稿卷之四終

吾師張珠南夫子弱冠舉於鄉屢試春官不第家貧親  
老無意遠游間或就聘鄰邑以謀菽水暇日閉戶攻苦  
不干世務濡筆爲詩寄託深遠當道聞其名折節下交  
終以議事不合拂衣歸去悒悒而卒年甫五十展誦遺  
集典型知不墜已

咸豐庚申夏五受業王禹疇謹誌